

# Pauro e te parauatua o te tatauro

**E**maa haapotora teie no te haapiiraa a Jean ZUMSTEIN, Örometua haapii no te Pü-haapiiraa Parauatua no Zurich (Herevetia). E haapiiraa tei faaterehia i te taime iritiraa no te matahiti haapiiraa a te Pü-haapiiraa Parauatua Porotetani no Montpellier i te 7/11/00. Na te veà ra Études théologiques et religieuses e pia i te tāatoàraa o teie haapiiraa i te mau taime i muri nei.

*E aha te fārraa faaroo, te faaiteraa rahi e te parauatua e vai nei i roto i te mau haapiiraa a Pauro ?*

## Ta na fārraa faaroo (1 Tōr 15, 3-7)

No roto mai ia i ta te hoê o te mau âmuira a teretetiâno o to na tau, oia te âmuira a Kerygmatique tei ora i to rātou faaroo èvaneria ia au i te mau àoraa e te mau haapiiraa a letu Metia. Ua ite o Pauro i te parau no te oraraa o letu, ua faaòhipa rā o ia i teie fārraa faaroo mā te niu i te faaroo i nià i te parau no te pohe tatauro o letu, riro mai nei te parau o te tatauro, no na, ei âresa e ei ômeta no to na faaroo, ta na faaiteraa e ta na parauatua.

Te faaòhipa nei o ia i te parau o te tatauro no te tūrama i te tāatoàraa o te oraraa faaroo èvaneria, e tae noa atu i te parau no teie nei ao i mua i te Atua. Nā roto i te parau no te tatauro, aita te Atua i faaòre i ta na ôhipa faaoraraa i ômuahia mai i roto i te Nūnaa Māiti. Te faaòhipa nei rā te Atua i te parau no te tatauro no te faaora e no te tià i te mau taata atoà e fāriu ia na ra nā roto i te Metia i pohe i nià i te tatauro e tei tiâfaahou mai.

## Ta na faaiteraa rahi (1 Tōr 1,18-25)

E parau tūrori te parau no te tatauro o te Metia no te Âti-luta, e parau maamaa hoi no te Herēni, ârēa no te taata faaroo èvaneria ra, o te püai ia e te paari o te Atua. Te püai, oia te rāvèà faaora a te Atua mā te Metia, ôre atu ai e tià i te Âti-luta e faaòhipa i te parau o te ture e te haapaòraa i te ture ei rāvèà faaora i mua i te Atua ; ôre atoà atu ai e tià i te Herēni e faaòhipa i te paari e te māramarama ei rāvèà faaora i mua i te Atua.


Ta te parau o te tatauro e faaite mai, e òfaatau-aroha te faaoraraa a te Atua nā roto i te Metia. Tei te Âti-luta e te Herēni atu ra ia i te fārraa i teie horoà metua a te Atua, mā te fārii i te faufaa ôre o ta rāua nā rāvèà i mua i te Atua no te faaora ia

rāua iho. E tei te taata faaroo èvaneria te fārraa i teie horoà ei niu no te tāatoàraa o te oraraa i mua i te Atua, mā te ite e i te mau taime atoà a faaòhipa ai o ia i te ture e aore ia i te paari e te māramarama ei mauhaa na na no te faaora ia na iho i mua i te Atua, e fā mai te parau o te tatauro ei parau tūrori e aore ia ei parau maamaa, oia hoi ei faaararaa ia na e te hahi ra o ia i mua i te Atua o te tatauro.

## Ta na parauatua

O Pauro te taata mātāmua roa i faaòhipa i te tatauro ei niu no te parauatua teretetiâno. Aita anaè te parauatua, e ora vāvā noa mai ia te tatauro, e aita anaè hoi te tatauro ra, e ora matapō noa mai ia te parauatua. E ia parau anaè hoi te tatauro ra, e piti ôhipa o ta na e faatupu mai : te tūrori e te maamaa (oia hoi te peàpeà e te huehue no te feià i pātoi i te Atua o te tatauro) e aore ia te hau e te òaòa (no te feià i fārii i te Atua mā te Metia i faatataurohia e tei tiâfaahou).

I te mau vāhi atoà e faaâti-iuta ai te mau taata (te hinaaroraa te taata e faaora ia na iho nā roto i ta na mau ôhipa i mua i te Atua) e aore ia e faaherēni ai rātou (te hinaaroraa te taata e faaora ia na iho nā roto i to na paari e to na māramarama i mua i te Atua), e faatupu mai te parauatua o te tatauro i te peàpeà e te huehue i roto i te paari e te māramarama o te reira mau




Tihiri Lucas i roto i tana piha ôhipa i Montpellier

taata ei tautururaa ia rātou ia ite e ia fārii i te faufaa ôre o ta rātou mau rāvèà no te faaora ia rātou iho i mua i te Atua. Te aratairaa a te parauatua o te tatauro i rotopū i te reira mau taata, o te fāiteraa ia ia rātou e tei te pae âvae o te tatauro o te Metia te faaoraraa a te Atua.

Mai te ànotau o Pauro, te tau no te Reforumâtiø e tae roa mai i teie mahana, ia parau anaè te parauatua o te tatauro, e peàpeà roa e huehue roa te mau taata o teie nei ao tei faaòhipa i te mau rāvèà è atu i ta te Atua mā te Metia no te faaora i te taata hara.

Antonino Tihiri Lucas  
Montpellier

# SYNERGIE EQUIPEMENT S.A.R.L



■ Formation Macintosh® & Windows

■ Powermac • Pentium III Réseaux informatiques

■ Maintenance et assistance

■ Location MAC • PC • Rétroprojecteur

■ Fournitures, câbles, consommables,...

■ Tél 50.98.10

■ Fax 45.28.79

■ Vini 78.22.78

■ Avenue du Commandant Chessé, Faripiti - Papeete Tahiti

■ Boîte postale 2710  
98713 Papeete Tahiti

■ synergie@mail.pf



# Rururaa a te mau haapii èvaneria o te tuhah 2

## Te fāliraa e te tumu parau

I te mahana māa 28 no Atopa, ua faatupu te tuhah 2 i te rururaa a te mau haapii èvaneria i roto i te pāroita no Vairaō. Ua tairuru mai 163 haapii èvaneria i roto i te fare āmuira no lerutarema. Ua fārii hia te rururaa e te pipi òrometua Ariirua na roto i te pari-pari fenua o Vairaō i te nā ôraa e:

*Tei riri tei tō ôtiā, ôiōi noa Vaipihaa i te tai*

*Ua tīraha noa pautu i te tai àtupa i te tai e pā pōā paaīna*

*Mouā tei niā o Fare ava, tahua to raro o Potii*

*Tahua faahee tapairu .*

Ua tiā atoā mai te peretiteni o te mau haapii èvaneria Rakua e te tavana Doom no te aroha e no te faaitoito i to te rururaa i niā i te haapiiraa. Te tumu parau o teie rururaa a te mau haapii èvaneria: te vai, úputa o te ora. Ua titau hia te tomite rautī no teie haapiiraa. Te vai ra ihoa teie faanahoraa i roto i te mau haapii èvaneria o te tuhah 2 i te titaura i te tomite rautī no te faatere i ta rātou mau haapiiraa.

## Te tereraa o te rururaa

Ua ôpere hia te uiraa na niā i te paroita. I roto i te tuhah 2, e haapii èvaneria to roto i na paroita atoā e 9. Te auraa, ua âfaì noa mai rātou i te mau pāhonora no te vauvau i roto i te rururaa. Ua faaineine atoā mai te mau haapii èvaneria i te mau himene mā te faatano i niā i te tumu parau.

Te tereraa o te rururaa, ua hiò hia i na uiraa matamua e 4 e faafaea atu ai. I muri iho i hiò hia ai te mau uiraa e toe ra. Aita e fifi i ite hia. Ua ui mai ihoa te mau haapii èvaneriai i te mau vāhi o ta rātou i hinaaro i te titau i te māra-



marama. Ua matara maitai ra te mau uiraa i te pāhono hia e Mana.

Te rautīraa i te rururaa na Mārii òrometua i haapaò mai. Te mau rautī i tatara i te mau uiraa o Teorahere tiātono, Mana poro èvaneria e o Tehaapapa òrometua.

## Te mau manaò i niā i te haapiiraa

I niā i te uiraa matamua, e rave rahi manaò tei matara mai i niā i te tūàtiraa o te vai e te pape, e mea nāhea te pape te ôraa mai e te tūàtiraa te vai e te Atua. Te vai atoā te māramarama ôre i niā i te huru tupuraa o te rahu mai te faataaraa hia te pape niā e te pape raro. E aha mau te mea i vai niā e tei vai i raro.

No te uiraa 3, te vai ra ihoa te hiòraa a Mataio 3,16 no te mauruuru o te Atua i ta na Tāmaiti. Ua matara atoā

mai te manaò, te vai atoā ra te hiòraa a Māreto tei taaē i ta Mātaio. Te uiraa, o vai tei tano e o vai tei hape.

No te uiraa 5, ua matara mai te manaònàòraa o te mau haapii èvaneria i niā i na tāpao e faaòhipa hia ra i roto i te ôroà. Te vai ra te manaò, e rave i te mau hotu o te fenua nei. Terā parau aita ta te rautī e faaotiraa. Na te pāroita, te tuhah e hiò.

No te mau uiraa 7, 8 e te 10 ua mata-ra mai te parau no te manaònàòraa i te fenua. Ua ère te Māohi i te fenua. Ua fifi te Māohi ia na iho. Ua haapae i ta na: to na fenua to na reo, ta na māa...Te mau taata âià, ua faaruè i to rātou âià. E nāhea.

Ia au te mau manaò i matara mai i roto i te rururaa, te vai ra ihoa te manaò titau i te māramarama. Te vai atoā ra te hinaaro e faaâpī i te tahī mau ôhipa i matauhia. E te vai atoā ra te mau parau tei faatupu i te uiuira. Na te reira e faaîte mai, ua faufaa hia te haapiiraa. Te reira te mea e ite hia ra i roto i te mau haapii èvaneria òia ho i te hinaaro rahi i te haapiiraa. Ia haamaitai hia te Atua. Ia au te reo o te peretiteni o te mau haapii èvaneria i te nā ô raa e: "te haapilraa to mātou ia hinaaro rahi". Ua ite tātou, te taata tei hinaaro tāmau i te haapiiraa, e taata ia te imi noa ra i te rāveà e haamaitai ia na. Eita e ôre te reira te vāhi ta te mau haapii èvaneria o te tuhah 2 e poroi mai ra ia tātou.



Jean Teururai